

AKHBAR : BERITA HARIAN

MUKA SURAT : ONLINE

TARIKH : 01 MAC 2023

HARI : RABU

SENTIMEN : POSITIF



BERITA SUKAN DUNIA HIBURAN BISNES RENCANA WANITA Hujung Minggu BH Kapsul Belanjawan 2023

NASIONAL KES POLITIK PENDIDIKAN WILAYAH

Diskaun bayaran balik pinjaman PTPTN bermula hari ini

Oleh Ercy Gracella Ajos - Mac 1, 2023 @ 8:27pm

bhnews@bh.com.my



KUALA LUMPUR: Pelaksanaan diskaun bayaran balik pinjaman Perbadanan Tabung Pendidikan Tinggi Nasional (PTPTN) sehingga 20 peratus berkuat kuasa hari ini membabitkan empat kategori.

Ia termasuk diskaun 20 peratus atas baki hutang untuk penyelesaian penuh pinjaman.

Selain itu, PTPTN dalam satu kenyataan hari ini turut memaklumkan diskaun sebanyak 15 peratus untuk penyelesaian sekurang-kurangnya 50 peratus

daripada keseluruhan baki hutang.

Katanya, pemberian diskaun 15 peratus untuk bayaran balik melalui potongan gaji atau debit terus mengikut jadual bayaran balik juga diberikan kepada peminjam serta diskaun lima peratus untuk bayaran balik melalui aplikasi myPTPTN.

"Semua peminjam PTPTN termasuk yang dikenakan tindakan penguatkuasaan dan penerima wang pendahuluan pinjaman (WPP) layak menikmati insentif ini.

Sementara itu, PTPTN memaklumkan, bagi peminjam yang ingin membuat penyelesaian penuh pinjaman atau sekurang-kurangnya 50 peratus daripada baki hutang perlu membuat pengesahan baki pinjaman melalui aplikasi myPTPTN atau portal rasmi PTPTN di www.ptptn.gov.my atau menghubungi Eksekutif Pemasaran PTPTN sebelum membuat bayaran balik melalui saluran bayaran yang disediakan.

Peminjam yang sedang membuat bayaran balik melalui potongan gaji atau debit terus layak mendapat diskaun 15 peratus secara automatik.

"Peminjam yang ingin membuat potongan gaji atau debit terus pula boleh membuat permohonan melalui aplikasi myPTPTN atau portal rasmi PTPTN di www.ptptn.gov.my.

"Peminjam boleh memilih salah satu atau kedua-dua saluran untuk menikmati insentif ini," katanya.

Selain itu, diskaun lima peratus juga diberikan bagi bayaran balik yang dibuat melalui aplikasi myPTPTN.

"Peminjam boleh memuat turun aplikasi myPTPTN melalui 'App Store' bagi pengguna iOS, 'Play Store' bagi pengguna Android dan 'Huawei AppGallery'.

Bagi kemudahan pelaksanaan penangguhan bayaran balik pula, PTPTN memaklumkan semua peminjam yang dalam tempoh membayar balik dan mempunyai pendapatan bulanan kasar RM1,800 ke bawah layak memohon penangguhan kecuali peminjam yang menyertai program pengurusan hutang (DMP) di bawah Agensi Kaunseling dan Pengurusan Kredit (AKPK) bagi pinjaman PTPTN.

Permohonan penangguhan boleh dibuat mulai hari ini melalui portal rasmi PTPTN di www.ptptn.gov.my.

"PTPTN akan memaklumkan status kelulusan melalui e-mel yang dikemaskini semasa peminjam membuat permohonan dalam tempoh 14 hari bekerja selepas permohonan diterima.

"Peminjam yang diluluskan penangguhan, akan dikecualikan daripada tindakan penguatkuasaan dan perundangan sepanjang tempoh penangguhan bayaran balik berkuat kuasa," katanya.

"Kos pentadbiran atau ujah juga tidak dikenakan sepanjang tempoh penangguhan diberikan," katanya.

PTPTN menyifatkan insentif yang diberikan kepada peminjam PTPTN menunjukkan komitmen kerajaan dalam menyokong usaha PTPTN sebagai agensi di bawah Kementerian Pendidikan Tinggi (KPT) bagi memastikan kebajikan peminjam dan kelestarian dana pinjaman pendidikan untuk generasi akan datang.

"PTPTN menyambut baik insentif yang diberikan kepada peminjam PTPTN melalui pembentangan Belanjawan 2023 oleh Perdana Menteri yang juga Menteri Kewangan Datuk Seri Anwar Ibrahim.

Untuk sebarang pertanyaan, peminjam boleh melayari portal rasmi PTPTN di www.ptptn.gov.my atau menghubungi PTPTN melalui saluran Careline PTPTN di 03-21933000 yang beroperasi Isnin hingga Jumaat dari jam 9 pagi hingga 5 petang.

<https://www.bharian.com.my/berita/nasional/2023/03/1070970/diskaun-bayaran-balik-pinjaman-ptptn-bermula-hari-ini>